

# Pfluderi - Asyl (Alti Pfluderi)

grindet 1963



Fasnacht 2012

Sujet : **Woohne statt Bohne,**  
oder Familiegäarte stärke langsam

Ich bi dr Haiggi Hueber uss Glaibasel Wescht,  
als Familiegärtner bini Ain vo de Besch.  
Ich sträb nit no Macht und Gäld,  
dr Pflanzblätz isch my haili Wält.  
Im Gaarte steggt Härzbluet, das isch nit glooge  
ha d Aerbsli und d Riebli vo Hand uffzooge  
Ich schufft in mym Gaarte, due mi nit schoone,  
denn alles wo zellt, - sin myni **Bohne.**

In de Familiegäarte gohts wie in dr Uno zue  
mir hänn au mit verschiidene Landslyt z due  
My Nochber Rächts kunnt uss Italie,  
dä zichtet nääbe Pepperoni au no Dahlie.  
Dä uff dr lingge Syte stammt uss Albanie  
är stoht meh uff Gmies, wie uff Geranie.  
Uss dr Turkey kunnt dr Nochber, dä vo Oobe  
und sälle vo Unde dä ghert zue de Schwoobe  
Sisch aber glyych wo alli zämme wohne,  
was bi uns richtig zellt - sin **d Bohne.**

An scheene Summereebe ischs e Wahn,  
s herrscht diggi Luft, wie uff dr Autibahn.  
Yyfrig duet me in de Gäarte d Grill ahaitze,  
me hoggt im Rauch, wie in de Fümöir-Baize.  
Drait dr Wind, denn duets in alle Egge  
no Wirscht, Pizze und no Kebab schmegge.  
Ebitz zrugghaltig wurd sich in däm Fall lohne,  
im Winter gits denn wieder Spägg und **Bohne.**

Unhail droht, mir weeren is sapermänt,  
s kunnt gnippeldigg vom Baudepartemänt.  
S Basler Stimmvolgg het kirzlig bschlosse,  
zwanzig Prozänt Familiegäarte wärde gschlosse  
Me wird-, kame däne Blaaner draue,  
ghoobene Woohnruum fir uns Basler baue.  
Au my Gaarte wärde si nit verschoone  
und bald kame in myne **Bohne** wohne.

Ich hogg am Disch vo myner Gaartelaube  
und ka das eigendlig fascht nit glaube,  
dass uff mi scheen pfläggt Gaarte,  
dr Abrissbagger scho duet waarte.  
Mir Gäärteler stygge uff Barrikade  
und drotze dääne Baubrigade.  
Mir lehn is vo den Archtiggde-Herre  
nit aifach unseri Paradies zersteere.  
Unsere Uffstand wird sich sicher loone,  
mir wänn nit woone, mir wänn **Bohne**.

Wird in Basel nit scho gnueg baut,  
wird nit jede scheene Blatz versaut?  
Lueg doch die Betonwieschti a,  
wottschi wirgligg esone Basel ha?  
Was die Blaaner do blaane isch e Sind,  
die grien Lunge goht langsam vor d Hind.  
Mir wänn fir Basel e Betonfreyi Zoone  
und fordere: **Bohne statt wohne**.

Jetzt wird 3 Daag mitmarschiert  
und fir d Familiegäarte demonstriert.  
Mir klagen a, dien niemerts verschoone  
**Wohne statt Bohne**, das sell sich nit lohne.  
„S Rүүgerächt“ isch unser Ziel,  
ab uff d Gass - Pfluderi Asyl !!